



## **Comité Orientador 25**

### **Hakerek Livru Istória Rezisténsia Organizasaun Juvenil no Estudantil ba Luta Libertasaun Nasionál**

---

#### **MATA-DALAN BA HAKEREK NO SUBMISAUN ARTIGU *REVISTA HISTÓRIA DA RESISTÊNCIA***

#### **KONA-BA REVISTA**

Iha “*Revista História da Resistência*” ne’e, laos foku deit ba história juventude no estudante iha luta Libertasaun Nasionál maibé mós História Kontemporánu, Rezisténsia, Kultura, Filozofia, Estudu Memória no seluk-seluk tan konaba Timor.

#### **MATA-DALAN**

Mata-dalan ida ne’e atu fó instrusaun no regulamentu ne’ebé autór artigu-sira tenki intende no prenxe rekerimentu-sira. Autór artigu-sira tenki lee didiak instrusaun-sira hotu molok submete artigu mai CO25, hodi konsidera ba iha *Revista História da Resistência*. Bainhira la prenxe kritéria-sira ne’e maka CO25 bele fó fila hikas fali artigu ba autór.

CO25 hein no fiar katak, autór-sira molok submete artigu, kumprende no aseita ho kritériu ne’ebé iha mata-dalan submisaun ida ne’e.

#### **PREPARA ARTIGU**

Testu tenki hakerek ho Times New Roman; double-spaced; fônt 12; margins 1 Top ho Bottom, no 1.25 Left ho Right.

Artigu tenki hakerek husi minimal liafuan 800 to’o deit masimu liafuan 3000 (inklui nota ho referénsia).

Kada artigu, tenki inklui mós ho abstratu, máximu liafuan 250, liafuan-xave 5 nomós biodata badak máximu liafuan 100 (La inklui ba total liafuan 3000).

Artigu tenki iha nia korespondénsia ofisiál. Karik iha autór barak, tenki hili korespondénsia ka representante ofisiál atu bele komunika ho CO25. Karik autór barak, molok submete, autór hotu tenki hatene no komprende.

Lian ne'ebé hakerek bele deit Tetun, Portugéz, Inglés, no Indonezia. Karik hakerek ho Tetun, tenki ho Tetun Ofisiál – INL, no sita lian seluk karik tenki *italicize*, esepu ba naran própriu-sira hanesan naran estadu, ema-naran, osan, instituisaun no selseluk tan. Ezemplu: US Dollar.

Bainhira submete, autór tenki hatama esbosu finál ho fórmatu (Microsoft Word, aneksa ho PDF). Artigu tenki manda mai ([comiteorientador.co25@gmail.com](mailto:comiteorientador.co25@gmail.com)) no ([fernandoximenes87@gmail.com](mailto:fernandoximenes87@gmail.com)).

Artigu ne'ebé submete, tenki orijinal no molok ne'e seidak publika iha jornal sientífiku ruma, ka submete daudaun hela ba konsiderasaun editoriál seluk atu publika. Bainhira submete ona ba CO25, autór labele submete fali tan artigu hanesan ba iha konsiderasaun editoriál seluk. Karik akontese nune'e, CO25 sei fó fila hikas fali artigu ba autór.

## **REFERÉNSIA**

Uza modelu/estilu referénsia APA (American Psychological Association) – edisaun ikus.

## **KONA-BA REVIZAUN LIVRU**

Revizaun ba livru, aplika deit ba livru ne'ebé foin publika iha tinan rua ba kotuk. Revizaun livru labele liu liafuan 800. Bainhira revizaun tenki esprika klaru kona-ba infórmasaun bibliográfiku, koloka livru nia autór, tinan publikasaun, título, fatin no uma-publikasaun.

## **TIPU ARTIGU**

Artigu bele hatama ho modelu sira hanesan: artigu peskiza orijinal, ensaiu, revizaun artigu, artigu argumentativu no krítiku ne'ebé dedika ba estudu empíriku, teorétiku, metodológiku, revizaun literatura nomós estudu kazu-sira iha istória Timor-nian.

## **REVIZAUN (*PEER REVIEW*)**

CO25 asegura imparcialidade no akurasaun iha artigu sira ne'ebé submete mai. Kada artigu sei submete ba prosesu revizaun iha Editoriál Tékniku, to'o ba Meza Editoriál.

Atu asegura imparcialidade, justu nomós kredíbel ba prosesu revizaun, maka sei nesesáriu atu fó fali mós ba ajente iha comunidade siénsia investigasaun (Istória no Siénsia Sosiál nsst) nian hodi bele halo revizaun, nu'udar 'blinked/masked review', iha ne'ebé identidade autór nian sei la fó sai ba Meza Editoriál nomós peer reviewer.

Revizaun sei haree-hikas no ezamina hotu kedas konteúdu husi testu nia laran, hanesan abstratu, introdusaun, substánsia artigu, métodu, teoria, faktu to'o ba tabela, figura no referénsia-sira.

## **RESPONDE BA ARTIGU**

Artigu ne'ebé submete, bele *rejeita*, *simu* nomós *rejeita* maibé *haruka fila* atu hadia hikas.

*Rejeita*, katak artigu ki'ak tebes iha analiza, metodolojia, interpretasaun; bainhira artigu sai husi foku *Revista História da Resistência*; no menus tebes atu kontribui ba iha edisaun iha Revista História da Resistência. Autór sira sei simu notifikasaun hafoin sira submete ona artigu mai CO25.

*Simu*, bainhira revista pasa ona prosesu revizaun, maske iha deit revizaun ki'ik-oan sira. Hafoin simu, autór-sira sei simu notifikasaun hodi konkorda ba iha kritéria publikasaun no konsiderasaun seluk hanesan direitu autór no selseluk tan.

*Haruka fila*, bainhira editoriál CO25 nian *rejeita*, maibé nafatin enkoraja atu autór-sira bele hadia hikas no hatama fali. Kazu nune'e, bainhira editór-sira identifika poténsia iha artigu no mosu erru ki'ik-oan ne'e duni editór bele haruka fila atu amenta liu tan data empíriku no muda analiza balun. Hatama hikas la signifika editór garante atu simu ba publikasaun.

## **AUTÓR NO ÉTIKA**

*Authorship/Maknain*, CO25 sai na'in ba obra tomak revista ne'ebé iha; kona-ba permisaun, utilizaun no *copyrights* ne'e direitu ba CO25 nian; contributor (ne'ebé submete artigu) sira sujeitu ba 'Hakerek-Na'in' ka autor ba sira-nia artigu rasik, sujeitu ba hetan sitasaun-kréditu iha atividade akademiku;

*Permisaun*, katak CO25 mak rezerva direitu tomak ba revista. Ne'e katak, kontributor-sira la autóriza atu publika-hikas no reproduz la ho rekoñesimentu no autorizasaun husi CO25; autór ida-idak bele hetan nia kopia orijinal;

*Direitu Intelektuál*, CO25 rekoñese kontribuisaun no produsaun intelektuál husi kontributor-sira hanesan autór/na'in, tantu husi aspetu teorétiku, metodolójiku no analítiku ho mós kreatividade-sira seluk iha artigu ne'ebé submete;

*Kréditu*, kontributor-sira tenki asegura katak bainhira uza imajen, dokumentu, kuotasaun to'o ba sitasaun, tenki fó kréditu ba fonte orijinal-sira. Imajen, tenki asegura integridade imajen nian, atu labele muda nia kór, medida no ko'a tuir deit hakarak.

## **AKTU VIOLASAUN PESKIZA NO NINIA RESPONSABILIDADE**

Aktu hirak mensiona tuir mai, CO25 sei konsidera hanesan kondisaun ne'ebé viola étika iha peskiza nian. Violaun sériu hirak ne'e mak hanesan tuir mai:

*Fabrikasaun*, aktu hirak ne'ebé hatudu no prova katak, hakerek-na'in envolve iha aktu fabrikasaun hanesan inventa/karang deit istória, 'statement', argumentu ka tipu informasaun saida deit ne'ebé ho intensaun hodi koloka ba iha produsaun revista istória nian, maske la ezisti, no tuir fali rekayasa/bosok sira ne'ebé bele provoka tensaun polítika no instabilidade sosiál;

*Manipulasaun/Falsifikasaun*, aktu ne'ebé hatudu no prova katak, hakerek-na'in envolve iha prosesu manipulasaun, inventa tun-sa'e no lohi deit ho informasaun bosok-sira. Bele mós bainhira hakerek-na'in sira hakerek informasaun ka istória ne'ebé la tuir evidénsia ka faktu ne'ebé iha, ka troka tiha validasaun husi evidénsia orijinal;

*Plagiarismu*, aktu violasaun ne'ebé bele akontese bainhira artigu ne'ebé hakerek la konsidera, la sita no la fó kréditu ba iha obra no fonte orijinal-sira ne'ebé ajuda nia servisu. Tan ne'e, bainhira uza konseitu, teoria, data no argumentu ideia-sira hanesan halo-finji no falun-an hodi argumenta hanesan sira nian rasik, sei tama ba sujeitu aktu violasaun direitu intelektuál nian.

*Bias no Favoritismu*, artigu hakerek ho maneira bias, ka lori favoritismu ne'ebé fó justifikasaun no defende deit interese polítika ruma husi politika-na'in ka partidu polítika, sukuismu, rasa, relijiaun, ka fó preferénsia no julgamentu istorikál ne'ebé afavor deit ba Órgaun Diretivu no Membru CO25 balun deit, inklui mós nia belun no ema-seluk iha liur;

*Auto-plagiarismu*, katak iha artigu nia laran rasik, tenki apresenta metodolojia no rezultadu analiza kontextuál no teoretikál peskiza nian ne'ebé labele foti tomak obra anterior ne'ebé publika ona. Tan nune'e, labele uza obra anterior hanesan fali obra ne'ebé foun, no la autóriza atu duplika fila hikas produsaun kuñesimentu iha obra rua ne'ebé ket-ketak;

Aktu hirak ne'e hotu, hakerek-na'in mak sei responsabiliza tomak ba konteúdu artigu ne'ebé submete ba iha CO25. Karik akontese, CO25 sei simu kulpa ba nia integridade no kredibilidade iha públiku.

## **RESPONSABILIDADE EDITORIÁL**

CO25 sei reeve hikas molok simu artigu hodi konsidera ba publikasaun. Avaliasaun sei haree ba qualidade husi manuscript, importánsia no relevánsia husi artigu ba iha Revista História da Resistência.

Revizaun sei kumpri prinsípiu imparsialidade/independénsia, justu, onestu, kuidadu, efisiénsia no responsabilidade etikál.

## **ASESU NAKLOKE (*Open Access*)**

Artigu ne'ebé publika iha *Revista História da Resistência*, sei loke ba asesu husi públiku. Tan ne'e, revista ne'e loke gratuita ba leitór-sira hotu, no autór-sira tenki konkorda molok submete artigu no simu ba publikasaun.

**Ekipa Editoriál Comité Orientador 25:**

**Meza Editoriál:** Constâncio da Conceição Pinto “Terus”, Jacinto Alves, Gregório Saldanha “Mouris”, José M. Fernandes “Nakfilak”, Avelino M. C. da Silva “Shalar Kosi”, Antero Benedito da Silva ‘We-Moris’, no Maria Dadí Soares Magno.

**Editoriál Tékniku:** Antero B. da Silva; Eugénia Correia; no Fernando Ximenes